



Feja është sinqeriteti

Ebu Rukaje Temim ibën Eus Dariu (Allahu qoftë i kënaqur me të!) transmeton se Profeti ﷺ ka thënë: "Feja është sinqeriteti." E pyetëm: "Ndaj kujt?" Ai tha: "Ndaj Allahut, ndaj Librit dhe të Dërguarit të Tij, ndaj prijësve të muslimanëve, si dhe ndaj shtresës së përgjithshme të muslimanëve."

[Sahih] [Transmeton Muslimi]

Profeti ﷺ na tregon në këtë hadith se feja bazohet në sinqeritet dhe çiltërsi, në mënyrë që ajo të përmbushet ashtu siç ka urdhëruar Allahu, plotësisht, pa cungim e pa mashtrim. Profetin ﷺ e pyetën: "Ndaj kujt është sinqeriteti?" Ai tha: Së pari: sinqeriteti ndaj Allahut të Lartmadhëruar, duke punuar sinqerisht për Të, duke mos i bërë ortak (shirk), duke besuar në zotërimin, hyjnitetin dhe në emrat e cilësitë e Tij, dhe duke e respektuar urdhrin e Tij e duke thirrur për të besuar në Të. Së dyti: sinqeriteti ndaj Librit të Tij, që është Kurani i madhërishëm. Pra, të besojmë se ai është Fjala e Tij e libri i Tij i fundit, dhe se ai i shfuqizoi të gjitha ligjet (shariatet) para tij. Ne e madhërojmë atë dhe e lexojmë ashtu siç duhet. Punojmë sipas ajeteve të tij që janë krejtësisht të qarta (muhkemat) dhe i pranojmë ato që janë jo krejtësisht të qarta (muteshabihat). E mbrojmë atë nga interpretimi i shtrembëruesve, marrim mësim nga këshillat e tij, i përhapim dituritë e tij dhe ftojmë tek ai. E treta: sinqeriteti ndaj të Dërguarit të Tij, Muhamedit ﷺ. Pra, të besojmë se ai është profeti i fundit, t'i besojmë asaj që solli, t'u bindemi urdhrave të tij dhe t'u shmangemi ndalesave të tij. Ta adhurojmë Allahun vetëm me atë që ai solli, ta respektojmë, ta nderojmë, ta përhapim thirrjen e tij, t'i përhapim ligjet (shariatet) e tij dhe t'i mohojmë akuzat që hidhen kundër tij. E katërta: sinqeriteti ndaj prijësve të muslimanëve, duke i ndihmuar ata në të vërtetën, duke mos i kundërshtuar në çështjet e tyre, t'i dëgjojmë dhe t'u bindemi për sa kohë që i binden Allahut. Së pesti: sinqeriteti ndaj muslimanëve, duke u bërë mirë dhe duke i ftuar tek e mira, duke i ruajtur nga dëmet, duke u dëshiruar të mirat dhe duke bashkëpunuar me ta në mirësi e devotshmëri.

<https://sunnah.global/hadeeth/sq/show/66516>